

INTERVENCIÓN DEL PRESIDENTE DEL PRINCIPÁU D'ASTURIES

ALMUERZO-COLOQUIU DE L'ASOCIACIÓN PAL PROGRESU DE LA DIRECCIÓN

Uviéu, 20 de xineru del 2015

El vienres visité'l Muséu de la Minería y de la Industria en L'Entregu. Celebremos l'ampliación de la so colección con un graniador de pólvora construyíu n'Alemaña en 1890. Arriendes del so valor museísticu, la pieza tien l'aspectu de los artiluxos de la dómina: fortaleza, solidez, musculatura metálica.

Ye una máquina propia de la segunda revolución industrial, cuando paecía qu'Europa topare la puerta abierta al desenvolvimientu interminable. N'Asturies, al calor de la explotación de la hulla, llegaron capitales españoles, sobre manera vascos, y estranxeros qu'impulsaron numberoses iniciatives. Col so emburrie nes mines y la metalurxa, cola espansión del ferrocarril, los desenvolvimientos portuarios y la organización del movimientu obreru construyóse la xeografía fabril de castilletes, fornos altos y chimenees que toos caltenemos na memoria, y tamién el paisaxe sociopolíticu d'Asturies. Convídalos a que vuelvan al Muséu de la Minería cuando tengan ocasión: ellí van atopase col alma industrial que dio llugar a l'Asturies de güei.

El títulu qu'escoyeron pa esta xornada ye, precisamente, *Reindustrializar pa ganar n'Asturies*. Xustifíqueno con esti razonamientu: “España”, dicen, “nun pue permitise seguir perdiendo pesu industrial”. Y añeden: “demostróse que los países que más apostaron pola industria aguantaron meyor la crisis, xeneren más empléu cualificáu y son más innovadores y esportadores”.

Lo qu'afirmen ye una constatación. Por tanto, nun ye discutible. Amás, comparto'l planteamientu de fondu. Va munchos años que faigo fincapié na importancia d'una bona base industrial. Cuando lo sostengo añedo xeneralmente un precuru: defender la industria nun ye un exerciciu de señardá. Nun toi falando de l'añoranza d'un pasáu de regresu imposible, sinón de la construcción del futuru d'Asturies. Perdonen qu'insista una vegada más, porque ye importante. Nun confundamos la defensa del porvenir industrial con un enfotu numantinu (por ello, condergáu al fracasu, anque sí heroicu) en caltener lo que yá nun existe. Repasen la composición del conseyu rector d'esta organización, de la APD, y van ver representantes d'inxenieríes, del sector agroalimentariu, construcción, de la metalurxa, de les telecomunicaciones Toa esa diversidá, a la que naide nun va negar la so capacidá novísima, entra nel sector industrial.

Dicen ustedes que los países qu'apostaron pola industria tienen más empléu cualificáu, son más innovadores y esportadores. Sí, ye cierto. Pero va una década non toos lo tenemos tan claro, y la industria merecía menos atención. España desapegaba percima de la media europea y paecíamos que díbamos algamar el plenu empléu. Vieno la crisis

y aquel paisaxe económicu quedó esfarrapáu. Joan Coscubiela atopó una imaxe afortunada pa describilo: España desenvolviera la economía del ocalitu, un modelu de crecedera bien rápido, pero enraigada nel sable, fráxil ante cualesquier contratiempu. Los mayores ocalitos taben llantaos a la vera del Mediterraneu: les grandes pómpares de la burbuja inmobiliaria.

Si aprendimos la llección, pa qu'eso nun vuelva asoceder el texíu económicu tien de prender con raigaños más robustos. Ende ye onde vien la implantación industrial.

Por fortuna, esta ye una esmolición compartida. N'Asturies, n'España y na Unión Europea. La Estratexa Europea 2020 plantea que les actividaes industriales apurran el 20 % del PIB nesi exerciciu. Anguaño, n'Asturies superamos llixeramente esi oxetivu, col 20,42 %. Ye menester indicar que nesi porcentaxe ta incluyida l'aportación del sector enerxéticu. Si nun la incluyimos, l'aportación sedría menor, como ye lóxico.

Agora que tamos toos d'alcuerdu na importancia de l'actividá industrial, agora que yá asumimos que nun ye un enfotu señardosu, hai que se preguntar si tamos faciendo lo conveniente p'avanzar escontra esa meta. Pa responder, detallo primero varios condicionantes.

Ún ye'l que podríamos denominar la paradoxa asturiana. Resúmola: mientres les últimes décadas del sieglu XX, Asturias soportó un amenorgamientu bien fuerte de la so industria. Sufrimos una desindustrialización. Malapenes hebo sector que se llibrare: minería, siderurxa, metalurxa, estelleros, químicos, armamentu... L'axuste tuvo otra traza esencial: la desestatalización de la economía asturiana, antes dominada pola hexemonía de la empresa pública. Bien: tres esi cambéu, una mutación auténtica, toes eses actividaes non solo existen, sinón que siguen siendo en bona midida la base del nuestro potencial industrial. Hai una frase que se cita de continuo d'Antonio Gramsci que reza que “la crisis consiste xustamente en que lo vieyo muere y lo nuevo nun pue nacer entá”. L'italianu aplicábala a otres coses, pero pa lo que nos ocupa valnos, porque eso yera lo que sosteníen dalgunos: que yera imprescindible acabar rápido cola vieya industria pa facilitar la nacencia de la economía nueva. Aplicáu ce por be, esi criteriu diba resultar un erru: n'Asturies ye indispensable la continuidá de la vieya industria (modernizada y adaptada, como non). La siderurxa ye un bon exemplu: si nun fuéremos capaces de caltenela, güei la nuestra situación diba ser bien más fráxil. Desindustrializamos a estazón p'agora esmolecenos de reindustrializar: ende ta la paradoxa.

Otru condicionante ye'l binomiu que suma globalización y incertidume. Cola construcción europea y cola mundialización económica y financiera acabáronse dos coses: les fronteres y les seguridaes al llargu plazu, sacante la que bien aseguró Keynes: “al llargu plazu toos vamos tar muertos”.

Vivimos nun mundu global y, por tanto, más complexu, sometíu a tal interacción de fuerces, acelerada poles nueves tecnoloxíes, que'l cambéu ye permanente. Nesti mundu, la capacidá d'actuación d'un gobiernu autonómicu ye bien amenorgada. Esto yá lo reconocí en bien d'ocasiones, y sé que pa dellos adversarios políticos ye dalgo escandaloso que-yos suena a claudicación, cuando nun consiste más que n'aceptar la realidá.

Contra la tentación del repliegue, tenemos d'avezanos a mirar más escontra fuera, a entender que l'esterior (les decisiones de la Comisión Europea, la situación internacional) ye'l nostru competitivu y nun podemos nin tenemos de faer nada pa evitalo.

Por exemplu, tenemos que tar bien sollertes a iniciatives como'l Plan Juncker, concebíu pa movilizar una inversión de 315.000 millones. A estes altures, esiste entá demasiada borrina sobre esti proyectu, y, llamento dicilo, el Gobiernu d'España nun ayuda a estenala. Esti plan pue convertise nuna bona oportunidá pa tresformar la lliquidez esistente en demanda y pa encarar tamién infraestructures bien importantes pa la industria española, como les sos redes enerxétiques.

Echo de menos, y asina-y lo fixi saber al presidente del Gobiernu d'España, más información y cooperación colos gobiernos autonómicos pa escoyer los proyectos que puedan acoyese a esti plan d'inversiones. Dende ochobre del 2012, el Gobiernu de Mariano Rajoy nun volvió convocar la Conferencia de Presidentes. Asuntos como esti, o como la ordenación fiscal del Estáu, xustificaríenlo dafechu.

Ente los condicionantes ta la política industrial del Gobiernu central. Saben que les discrepancies del mio gobiernu col Ministeriu d'Industria fueron frecuentes y bien importantes. Sicasí, nun ye esti actu'l sitiu pa dedicame a recitar un cuadernu d'agravios. Namás voi sorrayar la importancia del problema enerxéticu. El preciu de la eletricidá nun pue seguir siendo un factor que llastre la competitividá de la industria n'Asturies y n'España. Hai qu'encarar esti asuntu y almitir dende'l principiu que nun tien una solución de partíu.

Como saben, presido'l Conseyu pa la Transición Industrial y Enerxética del Partíu Socialista, constituíu'l 16 d'avientu. Aproveché'l día de la so formación pa proponer un pactu d'Estáu pola enerxía y güei repito esa invitación. N'Asturies tenemos bien cerca lo asocedió cola factoría d'Alcoa n'Avilés. Con independencia de les estratexes empresariales de tal o cual compañía, nun podemos someter anualmente a los grandes consumidores eléctricos a la tensión d'una puya decisiva pa calcular los sos costos enerxéticos. Ustedes, empresarios, entiéndenlo perfectamente: ¿cómo decidir inversiones que precisen años de maduración si la evaluación de los costos enerxéticos depende del resultáu d'una puya que se repite exerciciu tres exerciciu?

Ye una amuesa de los problemas que merecen aldericase seriamente. Antes fixi mención a la relevancia de la siderurxa pal afitamientu de la nueva base industrial d'Asturies. Bien: Arcelor-Mittal ye tamién un gran consumidor eléctrico, como Alcoa o Asturiana de Cinc. ¿De verdá ye posible presumir de política industrial si los costos enerxéticos siguen siendo disuasorios frente a los d'otros países d'Europa? O, por poner otu casu, ¿puen camudase les condiciones qu'afecten a les instalaciones de coxeneración eléctrica ensin calcular la so repercusión sobre la factura de costos —y, por tanto, sobre la competitividá— de les industries?

Son cuestiones básiques y qu'esixen planteamientos al mediu y llargu plazu. Nun pueden rectificase de llexislatura en llexislatura. Por eso apelo tanto al pactu d'Estáu. El Gobiernu d'España ta perdiendo un tiempu preciosu pa sentase a buscar un gran alcuertu d'Estáu sobre la enerxía.

Por fin, el condicionante postreru confórmenlu les nuestres fortaleces y debilidaes. Nun voi estendeme na descripción d'un diagnósticu repitíu hasta l'escosamientu: una comunidá avieyada con un seriu problema demográficu, con poca población activo, periférica na periferia d'Europa, con escesu de microempreses, pero tamién una comunidá con una bona cultura industrial, con un capital humanu cualificáu, que fixo meyores grandes na internacionalización y la innovación empresarial, que tamién amenorgó de manera notable les sos problemes d'infraestructures y comunicaciones.

Sobre esta semeya tan conocida de la nuestra realidá dexo dos apuntes. Ún, sobre les comunicaciones: terminada l'autovía del cantábricu, la nuestra gran urxencia ye la finalización de la exa que venceya l'alta velocidá ferroviaria, la Zalia y el puertu d'El Musel, incluyíos los sos accesos y la so planta regasificadora. Ye un asuntu angular pa Xixón, p'Asturies y el nostru desenvolvimientu industrial. La culminación del trazáu previstu de l'alta velocidá ferroviaria nun puede tar sometida a más incertidumes al respective del so calendariu, les sos característiques y el so financiamientu.

Nun me gusten los políticos que quieren poner el so bustu, el so sellu y la so firma a les obres públiques como quien bordan les sos iniciales na pechera de la camisa. Soi de quien entienden qu'esos proyectos llógrense con esfuercios acomunaos. Si l'autovía del cantábricu se terminó ye porque s'asocedieron gobiernos qu'invirtieron en tolos sos tramos. Y si hebo retrasos impropios ye porque s'abrieron discutinios y s'añedieron problemes innecesarios. Nun repitamos los erros cola alta velocidá ferroviaria, el desenvolvimientu de la Zalia y los accesos a El Musel: entendamos que son necesidaes p'Asturies, non patrimonios de partíu. Por eso defendo y propongo un consensu básicu pa entainar la finalización d'obres y equipamientos que, ensin cayer nesi fetichismu de les comunicaciones que dacuando soportamos, son vertebrales p'Asturies, un territoriu alloñáu físicamente de los mercaos centrales, lo que supón un costu adicional pa la distribución de los productos, y la evidencia de la importancia del tresporte ferroviario y marítimu, más eficaces nes grandes distancies que la carretera. Nun escluyo a alministración dalguna, sía local, autonómica o estatal, y pido tamién que nenguna s'autoescluya. Esti déficit de consensos básicos sobre les infraestructures ye una rémora, un atavismu que tendríamos de zarrar baxu doble llave, como proponía Joaquín Costa pal sepulcru del Cid.

El segundu apunte atiende a los principales datos de la nuestra industria:

—Dende'l 2008 hasta'l 2013, l'aportación de la industria al PIB autonómicu menguó dos puntos, dende'l 22,4 al 20,4. La media nacional, sicasí, aumentó llixeramente, dende'l 16,9 hasta'l 17,4. Recuérdoyos que nestos porcentaxes ta incluyíu'l sector enerxéticu, como ya señalé primero.

—Polo que fai al empléu xeneráu pol sector industrial n'Asturies, nel 2013 sumó 48.495 persones, frente a los 63.059 del 2008.

—Y, a lo último, si facemos referenica a la facturación, tamién menguó: dende 15.064 millones nel 2008 hasta 13.360 nel 2013.

¿Cómo podemos interpretar estos números? La evidencia ye que la nuestra industria se vio seriamente afectada pola crisis y que, magar ello, la so dimensión y aportación ta percima de la media nacional. Entá tenemos una ventaya comparativa que ye menester

caltener. Sicasí convién mirar atrás: ye evidente que'l patrón de capitalización español difirió, mientras la bonanza económica, del de los países más desarrollaos. Fízolo en tres aspectos: l'esfuerciu inversor foi mayor, la so orientación escontra los activos inmobiliarios más intensa, y la productividá de los capitales menor.

N'España la dotación de capital por habitante sigue siendo menor que nos países de referencia, colo que l'esfuerciu inversor tien que s'intensificar, pero la orientación de la inversión y la productividá de los capitales ha variar.

N'Asturies tamién, la nuestra dotación de capital ye mayor que la media nacional n'infraestructures públiques (un 3,6 % sobre'l total) pero nun lo ye, sicasí, en TIC; y los ritmos de crecedera del capital industrial fueron menores, anque supere, en términos netos, la media nacional.

Déxenme tamién señala-yos qu'Asturies cuenta con un nucleu competitivu bien eficiente en delles actividaes granibles ente les industriales: Enerxía eléctrica, agua y gas, metalurxa y fabricación de productos mecánicos, química, o productos minerales non metálicos que con costos llaborales unitarios inferiores al promediu estatal, tienen una productividá media del trabayu y un costu mediu llaboral superiores a les medies nacionales respectives.

Esto ye, nun tamos falando a cencielles de ventayes derivaes d'unos costos llaborales inferiores, sinón d'un funcionamientu más eficiente, que ye lo que convierte a un sector en vidable al llargu plazu.

Concluyo. La xestión d'un gobiernu ta siempre n'evaluación pública. Depués, a la de les elecciones, y yá va quedando poco, la ciudadanía va decidir col so votu. De la mesma, ustedes van escoyer la calificación que consideren. Pela mio parte, asegúro-yos que'l Gobiernu d'Asturies atiende con procuru la política industrial y ye dafechu consciente del so calter prioritariu. Nun tenemos, ye verdá, un nivel óptimo de recursos, pero tamién m'atrevo a afirmar que l'esfuerciu ta bien enfocáu. Refiérome, por exemplu, a les siguientes llinies de trabayu, la mayoría explícites na Estratexa Industrial acordada ente'l Gobiernu d'Asturies, la patronal y los sindicatos.

Defensa de les industries yá implantaes. Esti Gobiernu empenóse na defensa de toles industries de la nuestra comunidá. Unes vegaes nun conseguimos el nostru oxetivu; otres, sicasí, contribuyimos a una bon resultáu, como asocedió en Tenneco y Alcoa. Asegúro-yos que vamos seguir lluchando cola mesma voluntá en tolos casos que se presenten.

Fomentu de la internacionalización y la esportación. L'apuesta por esti oxetivu nun tien discusión posible. En xunetu del 2013 aprobemos el Programa pa la Internacionalización de la Empresa asturiana, que se realiza al traviés d'Asturex. Con datos d'ochobre del 2014, les ventes atroparen una crecedera del 7 %. Por añedir otu datu, l'añu pasáu 120 empreses pasaron pol programa d'iniciación a la esportación.

Tocantes a la innovación, otra exa fundamental, l'Idepa punxo en marcha distintes programes. Nel períodu 2012-2014, el Gobiernu d'Asturies subvencionó con 12,9 millones 454 proyectos que sumaron 56 millones d'inversión total.

A estes iniciatives hai que sumar otres, como la meyora de la formación y la implantación, entá nuna fase inicial, de la FP dual; la simplificación de trámites alministrativos pa l'actividá empresarial, que se ta aplicando yá y que va seguir con más fuerza nos meses vinientes; o la creación de condiciones pal desenvolvimientu industrial en redol a actividaes nueves: ye lo qu'asocede, por exemplu, coles posibilidaes qu'ufierten los hospitales nuevos pal ámbitu biosanitariu.

Termino con una reflexón. Va unos minutos reconocí que la capacidá d'un gobiernu autonómicu pa intervenir nel desenvolvimientu económicu ye llimitada. Pero tamién creo que, con toles dificultaes qu'hebo, a lo llargo d'estos años llibremosnos de trastes vieyos. Refiérome, por exemplu, a la reconocencia social de la iniciativa privada: naide nun tien dulda güei de la so potencia y de la so necesidá. Nesa mesma superación de cuestiones antigues, quiero señalar la capacidá d'interlocución y alcuerdu demostrada —y nun ye un méritu esclusivu— p'aprobar los presupuestos autonómicos d'esti exerciciu pol bien d'Asturies, percima de tentaciones partidistes y de mieos electorales. Cuando les circunstancias lo piden —y, bien ye verdá que tamos nunes circunstancias bien esixentes—, los políticos tenemos que ser capaces d'acreditar que podemos actuar cola responsabilidá que-yos pidimos a ustedes, a los empresarios y a tola ciudadanía. Yo, asegúro-ylo, toi intentándolo tolos díes.

Munches gracies.

